

Neyemi

Neyemi a Fe Taruxuna

Neyemi findi Yahudiyana nde nan na Esirasi a waxatini. Muxu dinaxin nan yi Neyemi ra. Perisene mangan naxan xili Arataserekesi, na kuntigi kɛndɛna nde nan yi Neyemi ra. Neyemi mangan mafan nɛn alogo a xa tin a siga Yerusalɛn taani alogo a xa sa feene yitɔn lan a konna siga feen ma yɛɛn na. A to na li, hali yaxuna ndee to yi katama e xa a yɛɛ rati, a kon kaan muxu wuyaxi a mali nɛn. E yi Yerusalɛn taan nabilinna yinna ti. Neyemi mɔn yi Esirasi mali dina sali gbeena nde yi, Esirasi Alaa sariya kitabun xaran naxan yi. Lewine yi lu a yɛbɛ yamaan xa alogo e xa a famu, nayi e yi e sɔbɛ so Alaa fe yi. Neyemi yi yamanan dɔxɔ kiina nde yɛba. A yi taan nabilinna yinna ti sɛwa sanla raba, a mɔn yi yamaan nakɔta sariyan suxu kiin ma.

Neyemi Ala maxandina

¹ Xakaliyaa dii xɛmɛn Neyemi a falane.

Kisilewi kiken na, Arataserekesi a mangayaan jɛɛ mɔxɔjɛdeni, n yi Suse manga taani.

² Ngaxakedenna Xanani nun muxuna ndee yi fa sa keli Yuda yi. N yi e maxɔdin Yahudiyane fe ma, yaxune naxanye suxu, e siga e ra konyiyani, e jɛjɛne mɔn yi xɛtɛ Yerusalɛn yi, e nun lan Yerusalɛn ma fe ma.

³ E yi n yabi, e naxa, “Suxu muxun naxanye lu e nii ra, na ndee bata fa dɔxɔ Yuda yamanani, koni

e yigitεgεxi, e yagixi. Yerusalen taan nabilinna yinne yirena ndee bata bira, tεen yi taan so dεene birin gan.”

⁴ N to na falane mε, n yi dαxα, n wuga, n yi sunu xi wuyaxi, n yi sun, n yi Ala maxandi, Ala Naxan Kore,

⁵ n naxa, “Alatala, Ala Naxan Kore, naxan gbo, a magaxu, i tan naxan i ya layirin nun i ya hinanna luma i xanuntenne xa naxanye i ya yamarine suxuma,

⁶ i tuli mati, i yi i yεen ti n na, i yi i ya walikεna maxandi xuiin namε. N ni i maxandima waxatini ito yi i ya walikεne xa, Isirayila kaane, kαeen nun yanyin na, n yi n ti Isirayila kaane yulubine ra bayo nxu bata yulubin liga i ra nxu nun n ma denbayana, nxu bata yulubin liga.

⁷ Nxu bata fe ρaxin liga i ra, nxu mi i ya yamarine nun i ya tαnne nun i ya sariyane suxi i naxanye so i ya walikεen Musa yii.

⁸ I ya falana fe xa rabira i ma, i naxan so i ya walikεen Musa yii, i naxa, ‘E na tinxintareyaan naba waxatin naxan yi, n na ε raxuyama ayi nen siyane yε.

⁹ Koni, xa ε xεtε n ma, xa ε n ma yamarine suxu, ε yi e liga, nayi, hali ε sa bαxα xαnna danna ra, n sa fama ε ra nen yireni n denaxan sugandixi alogo n xinla xa lu na.*

¹⁰ I ya walikεne nun i ya yamaan nan e ra, i naxanye xunbaxi i senβε gbeeni.

¹¹ Marigina, i tuli mati n tan, i ya walikεna maxandi xuiin na, e nun i ya walikεen naxanye sεwaxi gaxuma i xinla yεε ra! N ma feene rasαnyaya

* **1:9:** Na feen sebεxi Sariyane 30.1-5 kui.

to, n tan i ya walikena, i yi a liga xemēni ito xa kininkinin n ma n na siga a yetagi.”

Na waxatini, n tan nan yi yengi saxi mangan minseene xən ma.

2

Neyemi Yerusalen yi

¹ Nisan kiken na, Arataserekesi a mangayaan ꞓεε mɔxɔꞓɛdeni, manpaan yi dɔxi mangan yetagi, n yi a tongo, n yi a so mangan yii. N yi sunuxi a yetagi, naxan ꞓɔxən munma yi liga n na singen.

² Mangan yi a fala n xa, a naxa, “I yetagini fɔrɔxi nanfera? Anu, i mi furaxi. Waxatina nde bɔꞓε rafɔrɛn ni ito ra.” N yi gaxu han,

³ koni n yi mangan yabi, n naxa, “Mangan xa lu a nii ra habadan! N yetagini fɔrɔxi nɛn bayo n benbane gaburune sa taan naxan yi, menna birin bata halagi, tɛɛn yi na taan so dɛɛne birin gan.”

⁴ Mangan yi a fala n xa, a naxa, “Nanse xɔli i ma, n xa a liga i xa?” N yi Ala maxandi naxan kore,

⁵ n yi mangan yabi, n naxa, “Xa mangan tin, xa n tan i ya walikɛɛn nafan i ma, n nasiga Yuda yamanani. N benbane gaburune sa taan naxan yi, n mɔn xa sa na ti.”

⁶ Mangana ꞓaxanla yi dɔxi a fɛma, mangan yi n maxɔdin, a naxa, “I ya sigatiin buma han waxatin mundun yi, i xetɛn waxatin mundun yi?” Mangan yi tin n xa siga, nayi n yi n xetɛ waxatin fala a xa.

⁷ N mɔn yi a fala mangan xa, n naxa, “Xa mangan tinꞓε, a xa kɛdine so n yii siga Efirati baan sogegododen binna yamana kanne ma, alogo e xa a lu n dangu siga han Yuda yi,

⁸ i mən yi kēdi keden so n yii Asafi xa, naxan mangana fətōnne kantanma, alogo a xa xalanbe wudine so n yii, n sa yire makantanxin dεene ti Ala Batu Banxin dεxən, e nun taan yinne nun n sa luma banxin naxan kui.” Mangan yi ne so n yii, bayo Ala yi n xən.

⁹ N yi siga yamana kanne fema naxanye yi Efi-rati baan sogegododen binni, n yi mangana kēdin so e yii. Mangan bata yi sofa kuntigine nun soo ragine bira n fəxə ra.

¹⁰ Sanbalata, Horoni kaan nun Amonina nde Tobiya, a walikεen to na mε, e yi xələ kati a nanfera muxuna nde fama a fa Isirayila kaane mali.

Neyemi yi yinne mato

¹¹ N yi so Yerusalen yi, n yi xi saxan ti na.

¹² Nayi, nxu nun muxuna ndee yi keli kəεen na, n mi a fala muxe xa n ma Ala bata yi naxan yita n na a n xa a liga Yerusalen xa. N keden peen nan yi dəxi sofanla fari.

¹³ N yi mini Lanbanna so dεen na kəε tagini siga Sube Magaxuxi Tigin nun Nepe dεen binna ra, n yi lu Yerusalen taan nabilinna yinne matoε. N yi taan yinna to kalaxi, a yire wuyaxi yi biraxi, tεen bata yi dεene gan nun.

¹⁴ N yi dangu Tigin so dεen nun mangana ige ramaraden dεxən, koni n ma soon mi a dangude soto.

¹⁵ N yi te xuden xən kəεen na, n siga taan yinne matoε Kadirən lanbanna binni. Na xanbi ra, n mən yi so Lanbanna so dεen na, n xεte na kii nin.

¹⁶ Taan kuntigine mi yi a kolon n yi sigaxi denaxan yi e nun n yi naxan ligama. Han na waxatini, n munma yi sese fala Yahudiyane nun

saraxaraline nun taa kanne nun kuntigine nun tide kan gbεteye xa.

¹⁷ Nayi, n yi a fala e xa, n naxa, “Ɛ bata a to en tɔrɔn naxan yi iki! Yerusalɛn bata kala, tɛɛn bata a so dɛɛne gan! Ɛ fa, en fa Yerusalɛn taan nabilinna yinne ti. Nayi, en mi fa yagima sɔnɔn.”

¹⁸ N yi a yeɓa e xa Ala n mali kii naxan yi, e nun mangan falan naxan ti n xa. E yi a fala, e naxa, “En siga, en sa taan ti!” Nayi, e yi e bode sɛnbɛ so na wali fajina fe yi.

¹⁹ Horoni kaan Sanbalata nun Amonin Tobiya a kuntigin nun Arabun Gesen to na mɛ, e yi nxu magele, e yi nxu rapaxu. E yi a fala, e naxa, “Ɛ nanse ligama ito ra? Ɛ murutɛma mangan nan xili ma ba?”

²⁰ N yi e yabi, n naxa, “Ala nɔɔn fima nɛn nxu ma, Ala Naxan Kore. Nxu tan, a walikɛne, nxu kelima nɛn, nxu yi a ti. Koni ɛ tan, ɛ mi kɛɛ sɔtɔn taani ito yi, ɛ mi sariya sɛ be, ɛ fe mi fa rabirama muxɛ ma Yerusalɛn taani!”

3

Yerusalɛn yinne yitɔnna

¹ Saraxarali kuntigina Eliyasibi nun a ngaxakeden saraxaraline yi keli walideni. E mɔn yi Yɛxɛɛne So Dɛni tɔn. E yi a rasariɗan, e yi a dɛɛne ti a ma. E yi taan yinna ti siga han sangansoon naxan yi xili Kɛmɛ, e yi na rasariɗan. E mɔn yi taan yinna ti siga han Xananɛli Sangansona.

² Yeriko kaane fan yi walima mɛnna dɛxɔn, e nun Sakuru, Yimiri a dii xɛmɛna.

³ Sena kaane yi taan so dɛni tɔn dɛnaxan xili Yɛxɛ So Dɛna. E dɛ wudine ti, e dɛene sa e ma e nun e balan wurene.

⁴ Yuriyaa dii xɛmɛn Meremoti fan yi walima na yiren dɛxɔn, Hakɔsi mamandenna. Bereki a dii xɛmɛn Mesulan fan yi walima na yiren dɛxɔn Mesesabele mamandenna, e nun Banahaa dii xɛmɛn Sadɔki.

⁵ Tekowa taan muxune fan yi walima na dɛxɔn ma. Anu, taan muxu gbeene tondi walɛ nɛn walikɛ kuntigine yamarin bun.

⁶ Yoyadaa dii xɛmɛn Paseya nun Besodiyaa dii xɛmɛn Mesulan yi Dɛ Fonni tɔn. E yi a dɛɛn wudine ti, e yi a balan wurene sa.

⁷ Gabayon kaan Melatiya fan yi yinna yirena nde yitɔnma na dɛxɔn ma, e nun Meronoti kaan Yadon nun Gabayon kaa gbɛtɛye nun Misipa kaane. E birin yi walima yamana kanna nan bun Efirati baan sogegododen binni.

⁸ Xarahaa dii xɛmɛn Yusiyɛli fan yi yinna yirena nde yitɔnma na dɛxɔn e nun Xananiya, latikɔnɔn nafalana nde.

E yi siga walɛ han Yerusalɛn yinna yigbo yirena.

⁹ Xuru a dii xɛmɛn Rɛfaya fan yi yirena nde yitɔnma na dɛxɔn, Yerusalɛn bɔxɔn fɔxɔ kedenna yirena nde kuntigina.

¹⁰ Xarumafaa dii xɛmɛn Yɛdaya fan yi walima a banxin yɛtagi, Xasabaneyaa dii xɛmɛn Xatusi fan yi yinna yirena nde yitɔnma na dɛxɔn.

¹¹ Xarimi a dii xɛmɛn Malakiya nun Paxata-Moyabaa dii xɛmɛn Xasubu fan yi walima yire gbɛtɛye yi siga han sangansoon naxan xili Buru Gandena.

12 Haloxesi a dii xεμεη Salun nun a dii tεμεηe fan yi yinna yirena nde yitεnma na dεxεn, Yerusalεn bεxεn fεxε kedenna yirena nde kuntigina.

13 Xanun nun Sanowa kaane yi Lanbanna So Dεni tεn. E yi a dεεη wudine ti, e yi a balan wurene sa. E mεn yi nεngεnna ye wuli keden fan yitεn taan yinni, siga han Xuruse Neηe Dεna.

14 Rekabu a dii xεμεη Malakiya, Beti-Hakeremi kuntigin yi Xuruse Neηe Dεni tεn. A yi a dεεη wudine ti, a yi a balan wurene sa.

15 Kola-Xose a dii xεμεη Salun, Misipa kuntigin yi Tigi Dεni tεn, a yi a ti, a yi a xunna soon so a xun na, a yi a dεεη wudine ti, a yi a balan wurene sa. A mεn yi taan yinni tεn Selaxa igε ramaraden dεxεn, dεnaxan mangana nakεn fεma, siga han tedene, dεnaxan sigama Dawudaa Taani.

16 Dεnxεn na, Asabuku a dii xεμεη Neyemi, Beti-Suru fεxε kedenna kannu yi siga yinni tεηe Dawudaa gaburun binni siga han igε malanden binna, siga han mangana sofane banxina.

17 A xanbi ra, Lewi bεnsεnna muxune yi walima Bani a dii xεμεη Rexun bun ma. Hasabi, Keyila fεxε kedenna kuntigin fan yi taan yinni tεnma a dingirani.

18 A ngaxakedenne fan yi walima a xanbi ra, Xenadadaa dii xεμεη Bawayi, Keyila fεxε kedenna bonna kuntigin bun.

19 Misipa kuntigin Yosuwe a dii xεμεηa Eseri fan yi yire gbεε yitεn, keli yeηgε so seene malan banxin yeηagi, siga han dεnaxan xili Songenna.

20 Sabayi a dii xεμεη Baruku fan yi yire gbεε yitεn a xanbi ra, keli Songenna ma siga han

saraxarali kuntigina Eliyasibi a banxin de ra.

²¹ Yuriyaa dii xemen Meremoti, Hakəsi mamanan-denna fan yi yire gbete yiton a xanbi ra, keli Eliyasibi a banxin so deen ma siga han a danna.

²² Saraxaraliin naxanye sa keli Yerusalen rabilinne yi, ne fan yi walima men xanbi ra.

²³ Ne fan xanbi ra, Bunyamin nun Xasubu yi walima menni e banxine yetagi. Ananiyaa dii xemen Maaseyaa dii xemena Asari fan yi walima menni ne xanbi ra a banxin dexon ma.

²⁴ Xenadadaa dii xemen Binuwi fan yi yire gbete yiton na xanbi ra, keli Asari a banxin ma siga han yinna songenna nde.

²⁵ Yusayi a dii xemen Palala fan yi walima na yinna songenna yetagi e nun sanganso kuyen manga banxin yetagi kantan tiine sansanna dexon. Parosi a dii xemen Pedayaya fan yi walima a xanbi ra.

²⁶ Ala Batu Banxin walikēen naxanye yi dōxi Ofeli geyaan ma, ne fan yi siga yinni tonje han sangansoon songenna ma, deen naxan xili Ige So Dena sogegododen binni.

²⁷ Tekowa kaane fan yi yinna yire gbete yiton ne xanbi ra, keli sangansoon songenna ma siga han Ofeli yinna.

²⁸ Deen naxan yi xili Soona, saraxaraline fan yi walima na faxan na e banxine yetagi.

²⁹ Imeri a dii xemen Sadōki yi walima e xanbi ra a banxin yetagi. A xanbi ra, Sekani a dii xemen Semaya fan yi walima menni, naxan yi deen kantanma naxan yi xili Sogeteden So Dena.

³⁰ E xanbi ra, Selemiyaa dii xemen Xananiya nun Salafaa dii xemen senninden Xanun yi menni, ne

fan yi yire gbete yiton yinna ma. Bereki a dii xemen Mesulan fan yi ne xanbi ra, a banxin yetagi.

³¹ A xanbi ra, xema wanla Malakiya fan yi walima menni, siga han Ala Batu Banxin walikene nun yulane banxina Mifikadi deen yetagi, siga han sangansoon naxan sa yinna songenna ma.

³² Xema wanla bonne nun yulane fan yi yinni ton keli sangansoon songenna ma siga han Yexene So Dena.

Yaxune yi wa wanla kala feni

³³ Sanbalata to a me a nxu mon yinna tima, a yi xolo han! A yi Yahudiyane magele.

³⁴ A yi a fala a ngaxakedenne nun Samari kaa sofane yee xori, a naxa, “Yahudiya fangatareni itoe nanse ligama? En tinje e xa na liga ba? E nae saraxan be ba? E a rananje to ba? E mon nae geme maluxunxine raminε ba naxanye benden nun se ganxine bun ma?”

³⁵ Amonina nde Tobiya yi a dexon ma, na yi a fala, a naxa, “Hali e ti, xa xulumasena nde sigan ti a fari, e geme yinna birin kalama nen!”

³⁶ Nayi, n yi Ala maxandi, n naxa, “Nxo Ala, i tuli mati nxu ra, amasoto nxu yaxune bata nxu ranaxu! I marayarabin naxete e ma, i yi e rasiga konyiyani.

³⁷ I nama dija e hakenε ma, e yulubine nama ba i yetagi, amasoto e bata yinna ti muxune makonbi.”

³⁸ Nxu yinni ton na kii nin han a yiteyaan tagi taan nabilinni. Yamaan yi na wanla suxu e sobeen na.

4

¹ Koni, Sanbalata nun Tobiya nun Arabune nun Amonine nun Asadodi kaane to a me a Yerusalen rabilinna yinna ti feen sigama yeen na, e nun a muxune bata yi a yire biraxine yiton folo, e yi xolo kati.

² E lan a ma a e birin xa sa Yerusalen yenge, e na kala.

³ Nayi, nxu bata nxo Ala maxandi, nxu yi kantan tiine dexo kosen nun yanyin na alogo e xa nxu ratanga e ma.

⁴ Anu, Yuda kaane yi a falama nen, e naxa, “Nxo walikene senben bata jan, geme biraxine maxali dixin mon gbo, nxu mi noe yinna tiye.”

⁵ Nxu yaxune yi a falama nen, e naxa, “Yahudiyane mi a kolonje, e mi a famunje han en yi so e tagi, en yi e faxa, en yi e wanli kala.”

⁶ Anu, Yahudiyani naxanye yi dxi nxu yaxune rabilinni, ne fa nen, e fa nxu rakolon na feen ma han dexoja ma fu, e naxa, “E fa en yengema nen sa keli yiren birin yi.”

⁷ Nanara, n yi muxuna ndee dexo yinna xanbirane yi denaxanye so jaxun, n yi yamanan muxune dexo bonsen yeen ma, e silanfanne nun tanbane nun xanle ra e yii.*

⁸ N to e ti kiin mato, n yi falan ti taan fonne nun kitisane xa e nun yamaan naxan birin yi na, n naxa, “E nama gaxu en yaxune yee ra. A xa rabira e ma fa fala Marigin senben gbo, a magaxu. E yengen so e ngaxakedenne nun e dii xemene nun e dii temene nun e jaxanle nun e dexoedene xa.”

* **4:7: Silanfanna:** Sofane yengeso degemana.

⁹ Nxu yaxune yi a mε fa fala nxu bata rakolon, a Ala bata e fe nataxin kala. Nxu birin yi xεε yinni, birin yi sa a wanla dε suxu.

¹⁰ Keli na lɔxɔn ma, n ma walikεne fɔxɔ kedenna nan yi fa walima, fɔxɔ kedenna yi tanbane nun yε masansan wure lefane nun silanfanne nun xanle suxu e yii, e yi e tagi xidi. Kuntigine yi Yuda kaane birin makantanma,

¹¹ naxanye yi yinna tima. Naxanye yi goronne maxalima hanma, e yi goronne kui sa, ne yi walima e yii kedenne nan na, e yi yεngε so seen suxu e yii kedenna ra.

¹² Naxanye yi a tima, ne birin ma silanfanne yi xidixi e tagi nεn, e yi walima na kii nin. Xεmεn naxan yi xɔtaan fema, na yi biraxi n fɔxɔ ra.

¹³ N yi a fala fonne nun kitisane nun yamaan dɔnxεn xa, n naxa, “Wanla gbo, wulani kuya, en bata xuya ayi yinna xuntagi, en bata masiga en bode ra.

¹⁴ Ε nεma dεdε, xa ε xɔtaan fe xuiin mε, ε malan nxu fema. En ma Ala yεngεn soma nεn en xa.”

¹⁵ Nxu siga wanla ma na kii nin, tanban suxi yamaan fɔxɔ kedenna yii keli subaxan ma han sarene yi mini kore.

¹⁶ Na waxatini, n mɔn yi a fala yamaan xa, n naxa, “Xεmεne birin xa xi Yerusalen yi e nun a walikεna, en kantanna ti kɔεεn na, en yi wali yanyin na.”

¹⁷ Nxu mi yi nxɔ dugine bama mumε, n tan ba, ngaxakedenne ba, n ma walikεne ba, muxun naxanye yi n kantanma ba, birin ma yεngε so seen nun a min igen nan tun yi suxi a yii.

5

Neyemi yi yigelitane mali

¹ Lɔxɔna nde, yamanan xεmεna ndee nun e naxanle yi e mawuga e ngaxakeden Yahudiyane fari,

² ndee naxa, “Nxu nun nxɔ dii xεmεne nun nxɔ dii tεmεne wuya. Nxu wama nεn nxu xa balon sɔtɔ alogo nxu xa nxu dεge, nxu lu nxu nii ra.”

³ Ndee fan yi a fala, e naxa, “Nxu bata nxɔ xεεne nun nxɔ manpa binle* nun nxɔ banxine dɔxɔ tolimani alogo nxu xa balon sɔtɔ fitina kamεni.”

⁴ Gbeteye fan naxa, “Nxu bata gbetin tongo donla ra nxɔ xεεne nun nxɔ manpa binle xun yi, alogo nxu xa mudun fi naxan lan a so mangan yii.

⁵ Anu, nxu nun nxu ngaxakedenne birin keden, nxɔ dii xεmεne luxi nεn alo e gbeene, koni a mato nxu nxɔ dii xεmεne nun nxɔ dii tεmεne matima konyine ra, nxɔ dii tεmε wuyaxiye bata findi konyine ra, nafulu mi nxu yii, nxɔ xεεne nun nxɔ manpa binle mɔn bata findi muxu gbeteye gbeen na.”

⁶ N to e mawuga xuiin mε, n yi xɔlɔ han!

⁷ N yi a ragidi n xa taan muxu gbeene nun kitisane maxadi, n yi a fala e xa, n naxa, “Ɛ tɔnɔn fenma ε ngaxakedenne ra nanfera!” N yi malan gbeen maxili e fe ra.

⁸ N mɔn yi a fala e xa, n naxa, “En bata en ngaxakeden Yahudiyane xun ba, naxanye yi saraxi siya gbetene xɔn konyine ra. Iki, ε tan yεtεen nan fa ε ngaxakeden Yahudiyane matima e Yahudiya

* **5:3:** Wudi binla nde na yi, mɛn kaane naxanye sima, e yi naxanye bogi yitɔnma alo manpana e gbee kiini.

bodene ma.” E mi fala sɔtɔ e naxan tiyε, e yi e dundu.

⁹ N mɔn yi a fala, n naxa, “E naxan ligama, na mi fan. E mi nɔε sigan tiyε Ala yεε ra yi gaxuni ba, alogo siya gbεtεye nama en nayelevu, en yaxune?”

¹⁰ N tan fan nun ngaxakedenne nun n ma walikene, nxu fan muxune doli nen gbetin nun donseni. Nayi, e lanma e xa naxan naxεtε, en nama na maxili.

¹¹ E sa e xεene raxεtε e ma to yeteni, e nun e manpa binle nun e oliwi binle nun e banxine. E nama tɔnɔ maxili e ra gbetin nun murutun nun minseen nun turen fari.”

¹² E yi yabin ti, e naxa, “Nxu e raxεtεma e ma nen, nxu mi fa sese maxɔdinma e ma, i naxan falaxi nxu na liga.”

Nayi, n yi saraxaraline xili, alogo e xa e kɔlɔ e yεε xɔri.

¹³ Na xanbi ra, n yi n ma doma gbeen lenbeni maxa, n yi a fala, n naxa, “Ala xa muxune birin yimaxa na kiini naxanye na e fala xuiin kala, a yi e bɔnɔ e denbayane nun e seene yi, alogo e yiigenla xa lu!” Yamaan birin yi Alatala tantun, e yi sɔnxɔ, e naxa, “Ala xa na liga, amina!” Dɔnxen na, yamaan yi a falan suxu.

¹⁴ Xabu n dɔxɔ lɔxɔni yamana kanna ra Yahudiyane xun na Yuda yamanani, xabu Manga Aratasεrekεsi a mangayaan jεε mɔxɔjεdena han jεε tonge saxan e nun firindena, n tan nun ngaxakedenne nxu mi sese ba mudun na naxan soma yamana kanna yii.

¹⁵ Yamana kanna naxanye dangu n tan yεε ra, ne yi donseene nun manpane rasuxuma nen yamaan

na e nun gbeti gbanan tonge naanin. Hali yamana kanne xoyine yi yamaan tərɔma. Koni, n tan to yi gaxuxi Ala yεε ra, n mi na sifan liga.

¹⁶ Koni, n tan yetεen wali nɛn taan yinna tideni, n mi xεε yo sara n yetε xa, anu n ma walikene birin yi yinna tiin fari.

¹⁷ Anu, muxu kemε tonge suulun nan yi e dεgema n konni Yahudiyane nun kuntigine ye, ba muxune ra naxanye yi fama sa keli yamanan nabilinna siya gbεtene ye.

¹⁸ Ninge keden nun yεxεε yεbaxi sennin nan yi faxama n xa lɔxɔ yo lɔxɔ e nun tɔxɛna ndee. Xi fu yo xi fu, manpa faɲi gbegebe yi rafalama n xa nɛn. Koni, hali na, n mi mudun maxili n tan yamana kanna xa, bayo wanla yi xɔdɔxɔ yamaan ma.

¹⁹ N ma Ala, n ma fe xa rabira i ma, i fan n na bayo n bata wali faɲin kε yamaan xa.

6

Yaxune mɔn yi fa e xili ma

¹ Sanbalata nun Tobiya nun Arabun Gesen nun nxu yaxun bonne yi a mε a n mɔn bata taan yinna ti, a dεdε mi fa kalaxi. Na waxatini, n munma yi dεεne ti singen.

² Sanbalata nun Gesen yi xεrane rafa a faladeni n xa, e naxa, “Fa en fa en bode to Kefirimi yi Ono lanbanni.” E bata yi a ragidi a e xa fe ɲaxin liga n na.

³ Koni, n yi e yabi, n naxa, “Wanla n yii han! N mi nɔε sigε. Nanfera wanla xa rati be, n siga ε fεma?”

⁴ E na xεraan nafa n ma dɔxɔɲa ma naanin, n fan yi e yabi na kii kedenni.

⁵ Sanbalata mən yi a walikεen nasiga na fala kedenna ra a suulundeni, kedi rabixin yi suxi naxan yi.

⁶ Ito nan yi sεbexi a kui, a naxa, “Siya gbεtεne ito nan falama, anu Gesen fan a falama, a nandin na a ra, e naxa a i tan nun i ngaxakeden Yahudiyane waxi murutε feni. I taan yinna tima na nan ma. A luxi alo i waxi findi feni Yahudiyane mangan nan na.

⁷ I yetεen bata nabine dαxα alogo e xa i ya fe fala Yerusalen yi fa fala a i bata findi mangan na Yuda yi. Perise mangan mi buma na mēdeni. Nayi, fa en fa batu.”

⁸ N yi a yabi, n naxa, “Muxe mi na falane tima. Nəndi mi i ya falane ra! I tan nan tun ne mirixi, i yi e fala!”

⁹ Na muxune birin yi wama nxu ragaxu feen nin, e naxa, “E sεnbεn njanma nεn, e mi wanla rananma.” Koni, n yi Ala maxandi, n naxa, “Ala, iki, n sεnbε so.”

¹⁰ N yi siga Delayaa dii xεmεn Semaya konni, Mehetabeli mamandenna, bayo a mi yi nεε fε n konni. A yi a fala n xa, a naxa, “En birin xa siga Yire Sarijanxini Ala Batu Banxin kui, en sa a dεεne balan en xun ma, amasətə i yaxune fama nεn i xili ma, e fama kəεen nan na i faxadeni.”

¹¹ N yi a yabi, n naxa, “Na muxu mi n tan na naxan a gima! N tan muxu sifan nεε soε Ala Batu Banxini ba, n lu n nii ra? N mi soma Ala Batu Banxini n luxundeni!”

¹² N yi a kolon fa fala a mi yi Alaa falan xan nalima n ma. Koni, a yi na falama n xa nεn, amasətə Sanbalata nun Tobiya bata yi a saranna

fi alogo a xa fa falan ti n xa na kiini.

¹³ A na liga nen alogo n xa gaxu a yee ra, n yi a maxadi xuiin suxu, n yi yulubin tongo. Nayi, e yi noe n xili kale nen, n yi yagi.

¹⁴ N ma Ala, Tobiya nun Sanbalata naxan ligama n na, na xa rabira i ma, e nun nabi naxanla Nowadi nun nabiin bonna naxanye kata n magaxudeni.

¹⁵ Taan yinna yi rajan Elulu kiken xi moxojen nun suulunde loxoni, xi tonge suulun e nun firinna bun.

¹⁶ Nxu yaxune to a me, e nun siyaan naxanye birin yi nxu rabilinxi, ne yi gaxu, e yi yagi e to a to a wanla bata yi rajan alo nxo Ala sagoon kii naxan yi.

¹⁷ Na waxatine yi, Yuda muxu gbeene yi bataxine sebema Tobiya ma waxatin birin, Tobiya fan yi e yabima.

¹⁸ Yuda kaan wuyaxi bata yi e kalo a xa, amasoto Sekani bitanna nan yi a ra, Araa dii xemena, e nun a dii xemene Yehoxanan bata yi Mesulan ma dii temene tongo, Bereki a dii xemena.

¹⁹ E yeteen yi a xili fadin fala n yee xori, e yi n ma falane rali a ma. Tobiya fan yi kedine rasigama alogo a xa n magaxu.

7

Yerusalen makantan fena

¹ Taan yinna to yelin tiye, n yi a deene ti a ma, kantan tiine nun beti baane nun Lewi bonsonna muxune yi ti e wanle ra.

² N yi Yerusalen kuntigiyaan taxu ngaxakendenna Xanani ra e nun Xananiya, Yerusalen yire makantanxin kuntigina. Lannaya muxu gbeen

nan yi Xananiya ra, e nun Ala yεεragaxu muxuna dangu bonne ra.

³ N yi a fala e xa, n naxa, “Yerusalen dεεne mi ra-bima fɔ sogen na te, a mɔn balanma nεn wurene ra ɲinbanna ra benun kantan tiine xa siga. Yerusalen kaane yi ti kantan tideni, ndee yi siga taan kantan tidene yi, bonne yi lu e konne kantanɲε.”

⁴ Taan yi gbo, koni yamaan mi yi wuya, banxine fan munma yi ɲɔxɔ yiti singen.

⁵ N ma Ala yi a sa n bɔɲɛni a n xa fonne malan e nun kitisane nun yamaan birin alogo n xa muxune yatε. N yi bɔnsɔn kɛdina nde to, muxun naxanye singe xεtε sa keli konyiyani, n yi ito to seβεxi na ma:

Esirasi 2.1-70

⁶ Babilɔn mangan Nebukadanesari siga muxun naxanye ra konyiyani, ne wuyaxi yi xεtε Yerusalen nun Yuda yi, birin yi siga a taa yi.

⁷ E yi xεtε e nun Sorobabeli nun Yosuwe nun Neyemi nun Asari nun Raamiya nun Naxamani nun Marodoke nun Bilisan nun Misipereti nun Bigiwayi nun Nexun e nun Banaha.

Isirayila yamaan xεmεne yatɛn ni i ra:

⁸ Parosi xabilani, muxu wuli firin muxu kεmε muxu tonge solofere e nun firin.

⁹ Sɛfati xabilani, muxu kεmε saxan muxu tonge solofere muxu firin.

¹⁰ Ara xabilani, muxu kεmε sennin muxu tonge suulun e nun firin.

¹¹ Paxata-Moyaba xabilani, Yosuwe nun Yowaba yixεtene yε, muxu wuli firin kεmε solomasεxε muxu fu nun solomasεxε.

12 Elan xabilani, muxu wuli keden muxu keme firin muxu tonge suulun e nun naanin.

13 Satu xabilani, muxu keme solomasexe muxu tonge naanin e nun suulun.

14 Sakayi xabilani, muxu keme solofere muxu tonge sennin.

15 Binuwi xabilani, muxu keme sennin muxu tonge naanin e nun solomasexe.

16 Bebayi xabilani, muxu keme sennin muxu mɔxɔɲen nun solomasexe.

17 Asagada xabilani, muxu wuli firin muxu keme saxan muxu mɔxɔɲen nun firin.

18 Adonikami xabilani, muxu keme sennin muxu tonge sennin e nun solofere.

19 Bigiwayi xabilani, muxu wuli firin muxu tonge sennin e nun solofere.

20 Adin xabilani, muxu keme sennin muxu tonge suulun e nun suulun.

21 Ateri xabilani, Xesekiya yixetene ye, muxu tonge solomanaanin muxu solomasexe.

22 Xasun xabilani, muxu keme saxan muxu mɔxɔɲen nun solomasexe.

23 Besayi xabilani, muxu keme saxan muxu mɔxɔɲen nun naanin.

24 Xarifi xabilani, muxu keme muxu fu nun firin.

25 Gabayon kaane ye, muxu tonge solomanaanin muxu suulun.

26 Betelēmi kaane nun Netofa kaane ye, muxu keme muxu tonge solomasexe muxu solomasexe.

27 Anatōti kaane ye, muxu keme muxu mɔxɔɲen nun solomasexe.

28 Beti-Asamawēti kaane ye, muxu tonge naanin muxu firin.

29 Kiriyati-Yeyarin kaane nun Kefira kaane nun Beroti kaane ye, muxu keɛɛ solofere muxu tonge naanin muxu saxan.

30 Rama kaane nun Geba kaane ye, muxu keɛɛ sennin muxu mɔxɔɲɛn nun keden.

31 Mikimasi kaane ye, muxu keɛɛ muxu mɔxɔɲɛn nun firin.

32 Betɛli kaane nun Ayi kaane ye, muxu keɛɛ muxu mɔxɔɲɛn nun saxan.

33 Nebo bonna muxune ye, muxu tonge suulun muxu firin.

34 Elan bonne xabilan muxune ye, muxu wuli keden muxu keɛɛ firin muxu tonge suulun e nun naanin.

35 Xarimi xabilani, muxu keɛɛ saxan muxu mɔxɔɲɛ.

36 Yeriko kaane ye, muxu keɛɛ saxan muxu tonge naanin e nun suulun.

37 Lodi kaane nun Xadidi kaane nun Ono kaane ye, muxu keɛɛ solofere muxu mɔxɔɲɛn nun keden.

38 Sena kaane ye, muxu wuli saxan muxu keɛɛ solomanaanin muxu tonge saxan.

39 Saraxaraline ye:

Yeɗaya xabilani Yosuwe a denbayani, muxu keɛɛ solomanaanin muxu tonge solofere muxu saxan.

40 Imeri xabilani, muxu wuli keden muxu tonge suulun muxu firin.

41 Pasaxuri xabilani, muxu wuli keden muxu keɛɛ firin muxu tonge naanin e nun solofere.

42 Xarimi xabilani, muxu wuli keden muxu fu nun solofere.

43 Lewi bɔnsɔnna muxune ye:

Yosuwe xabilani, Kadamile nun Hodawi
yixetene ye, muxu tonge solofere e nun naanin.

⁴⁴ Beti baane:

Asafi xabilani, muxu kemε muxu tonge naanin
e nun solomasεεε.

⁴⁵ Kantan muxune:

Salun nun Ateri nun Talamon nun Akubu nun
Xatita nun Sobayi yixetene ye, muxu kemε muxu
tonge saxan e nun solomasεεε.

⁴⁶ Ala Batu Banxin walikene:

E benbane nan itoe ra: Sixa nun Xasufa nun
Tabayoti nun

⁴⁷ Kerosi nun Siya nun Padon nun

⁴⁸ Lebana nun Xagaba nun Salamayi nun

⁴⁹ Xanan nun Gideli nun Gaxara nun

⁵⁰ Reyaya nun Resin nun Nekoda nun

⁵¹ Gasami nun Yusa nun Paseya nun

⁵² Besayi nun Meyunin nun Nefusin nun

⁵³ Bakabuku nun Xakufa nun Xaraxuru nun

⁵⁴ Basaliti nun Mexida nun Xarasa nun

⁵⁵ Barakosi nun Sisera nun Tama nun

⁵⁶ Nesixa e nun Xatifa.

⁵⁷ Sulemani a walikene yixetene ye: Sotayi nun
Sofereti nun Perida nun

⁵⁸ Yaala nun Darakon nun Gideli nun

⁵⁹ Sefati nun Xatili nun Pokereti-Hasebayin nun
Amon.

⁶⁰ Ala Batu Banxin walikene birin malanxina
e nun Sulemani a walikene: muxu kemε saxan
muxu tonge solomanaanin muxu firin.

⁶¹ Muxuni itoe nan keli Tela-Mela nun Tela-
Harasa nun Kerubu-Adan nun Imeri taane yi, koni
ne mi e xabilane kolon naxan a yite fa fala Isirayila
kaan nan e ra:

⁶² Delaya nun Tobiya nun Nekoda yixetene ye,
muxu kemε sennin muxu tonge naanin e nun firin.

⁶³ Saraxaralina ndee yi na: Xobaya nun Hakōsi nun Barasilayi yixetene. Barasilayi bata Galadi kaan Barasilayi a dii temen daxo, na nan xili te a xun ma.

⁶⁴ E yi kata e xabilane fendeni bōnsōn kedine kui, koni e mi e to. E yi e ba saraxarali wanla ra.

⁶⁵ Yamana kanna yi yamarin fi a muxu yo nama se sarixanxine don e ye han saraxaralina nde yi soto naxan masensēn ti seene rawale, Yurima nun Tumin.*

⁶⁶ Yamaan birin malanxina, muxu wuli tonge naanin muxu wuli firin muxu kemε saxan muxu tonge sennin.

⁶⁷ E walike xemene nun e walike jaxanle mi yi ne ye, ne muxu wuli solofere muxu kemε saxan tonge saxan e nun solofere nan yi a ra. Beti ba xemen nun a jaxanle, muxu kemε firin tonge naanin e nun suulun yi e ye.

⁶⁸ Nōgōmen kemε naanin tonge saxan e nun suulun, sofanla wuli sennin kemε solofere e nun mōxōne fan yi na.

⁶⁹ Denbaya xun wuyaxi seene fi nen wanla fe yi. Yamana kanna yi xemaan kilo solomasexe e nun a tagi nun igelengen tonge suulun e nun saraxarali domain kemε suulun tonge saxan fi wanla fe yi.

⁷⁰ Denbaya xunne yi xemaan kilo kemε kilo tonge solofere nun gbeti fixen kilo wuli keden kilo kemε ba.

⁷¹ Isirayila yamaan muxu dōnxene yi xemaan kilo kemε tonge solofere nun gbeti fixen kilo wuli

* **7:65: Yurima nun Tumin** masensēn ti seene fe sebexi Xōrōyaan 28.30 kui. Saraxaraline yi masensenna tima ne nan na alogo e xa Ala sagoon kolon.

keden ba e nun saraxarali domain tonge sennin e nun solofere.

⁷² Saraxaraline nun Lewi bənsəna muxune nun kantan tiine nun bəti baane nun Ala Batu Banxin walikene nun Isirayila yamaan birin yi dɔxɔ e taane yi.

Esirasi yi sariyan xaran yamani

Nɛɛn kike soloferedena a liyɛ, Isirayila kaane birin bata yi dɔxɔ e taane yi.

8

¹ Yamaan birin yi e malan yama malandeni Ige Dɛɛn na alo muxu kedenna. E yi a fala sɛbɛli tiina Esirasi xa a xa fa Musaa sariya kedin na, Alatala sariyan naxan yamari Isirayila kaane ma.

² Saraxaralina Esirasi yi fa sariya kedin na yamaan birin yɛtagi, xɛmɛn nun ɲaxanla, naxanye birin yi nɔɛ falan famunɲɛ e naxan mɛma. Kike solofereden xi singen nan yi a ra.

³ Keli xɔtɔnni han yanyi tagini, Esirasi na sariya kedin xaranma yamaan yɛtagi Ige Dɛɛn na, xɛmɛne nun ɲaxanle nun naxanye birin yi a famuma. Yamaan birin yi tuli matixi sariya kedin xaran xuiin na.

⁴ Sɛbɛli tiina Esirasi yi tixi wudi gbingbinna nan fari, naxan yi rafalaxi na feen ma. Matitiya nun Sema nun Anaya nun Yuriya nun Xiliki nun Maaseya yi tixi a fɛma a yiifanna ma. Pɛdaya nun Mikayeli nun Malakiya nun Xasun nun Xasabadana nun Sakari nun Mesulan tixi a kɔmɛnna ma.

⁵ Esirasi yi kedin nabi yamaan birin yεtagi, a tixi e birin xun ma, a to kedin nabi, yamaan birin yi keli.

⁶ Esirasi yi Alatala tantun, Ala naxan gbo, yamaan yi lu e yiine yite kore, e yi a yabi, e naxa, “Amina! Amina!” Nayi, e birin yi e xinbi sin, e yεtagine yi lan bɔxɔn ma, e yi Alatala batu.

⁷ Lewi bɔnsɔnna muxune, Yosuwe nun Bani nun Serebi nun Yamin nun Akubu nun Sabetayi nun Hodiya nun Maaseya nun Kelita nun Asari nun Yosabadi nun Xanan nun Pelaya, ne yi lu yamaan tixin xaranɲε sariyan ma.

⁸ Ne yi lu Alaa sariya kedin xaranɲε yamaan xa, e lu a yεβε e xa alogo e birin xa nɔ a famunɲε.

⁹ Nayi, yamana kannu Neyemi nun Esirasi naxan yi saraxaraliyaan nun sebeli tiini, e nun Lewi bɔnsɔnna muxun naxanye yi yamaan xaranma, ne yi a fala yamaan xa, e naxa, “Lɔxɔni ito bata rasariɲan Alatala xa, ε Ala. E nama lu sunuxi, ε lu wugε.” Bayo yamaan birin yi wugama nɛn, e nɛma yi sariya kedin xaran xuiin namεma.

¹⁰ Neyemi yi a fala e xa, a naxa, “E sa donse faɲin don, ε yi minse faɲin min, ε siga ndee ra muxune xa se mi naxanye yii, amasɔtɔ to lɔxɔn bata findi lɔxɔ sariɲanxin na en Marigin xa. E nama ε yetε rasunu, bayo Alatalaa sɛwan nan findixi ε sɛnben na.”

¹¹ Lewi bɔnsɔnna muxune yi yamaan birin maɣabari, e naxa, “E sabari, amasɔtɔ to lɔxɔn sariɲan, ε nama ε yetε rasunu!”

¹² Yamaan birin yi siga e dεgeden nun e min-deni. Se mi yi naxanye yii, e yi ndee so ne yii. E lu

sɛwa gbeeni, bayo e bata yi falane famu naxanye yɛba e xa.

Bubu Kui Sanla

¹³ Na xɔtɔn bode, Isirayila denbaya xunne nun saraxaraline nun Lewine birin yi e malan sɛbɛli tiina Esirasi fɛma alogo e xa sariya falane ramɛ.

¹⁴ Alatala sariya kɛdin naxan so Musa yii, a yi sɛbɛxi na kui fa fala, Isirayila kaane yi lanma e lu bubune kui Bubu Kui Sanla waxatini jɛɛn kike solofereden na.

¹⁵ E lan e yi na rali birin ma e taane yi e nun Yerusalɛn yi, e naxa, “E mini geya yireni, ɛ fa Oliwi bili yii taa kui xiine nun burunna xiine nun miriti bili yiine nun tugu yiine nun wudi yii jingixine ra alogo ɛ xa fa Bubu Kui Sanla raba alo a sɛbɛxi kii naxan yi.”*

¹⁶ Nayi, Isirayila yamaan yi mini, e siga jɔxɔnde fendeni, alogo e xa fa Bubu Kui Sanla raba e banxine dɛ ra hanma e sansanne kui, hanma Ala Batu Banxin sansanne kui, e nun yama malandene yi Ige Dɛɛn nun Efirami Dɛɛn na.

¹⁷ Muxun naxanye birin yi malanxi na, naxanye yi faxi sa keli konyiyani, ne birin yi bubune ti, e dɔxɔ e bubune yi. Keli Nunu a dii xɛmɛn Yosuwe a waxatin ma han na waxatini, Isirayila kaane munma yi na fe sifan liga singen, sɛwa gbeeni yi lu e tagi.

¹⁸ E lu Alaa sariya kɛdin xaranjɛ lɔxɔ yo lɔxɔ keli xi singen ma han lɔxɔ dɔnxɛna. E yi sanla raba xi solofere, yamaan yi e malan xi solomasɛxɛdeni, alo sariyana a falaxi kii naxan yi.

* **8:15: *Bubu Kui Sanla*** fe sɛbɛxi Saraxaraline 23.33-38 kui.

9

Eyi e ti e yulubin na

¹ Kiken xi məxəɲede ləxəni, Isirayila kaane yi e malan, e sun, e kasa bənbeli dugine ragodo e ma, e burunburunna sa e xunne yi sunu taxamasenne ra.

² Naxanye yi findixi Isirayila kaane ra, ne yi e masiga xəɲene ra, e yi e ti e yulubine ra e nun e benbane gbeene.

³ E to keli, e ti, e yi Alatala, e Alaa sariya kedin xaran waxati xunkuye. Yanyin na, e yi e xinbi sin Alatala yetaɲi, e Ala, e mən yi e ti e yulubine ra han waxati xunkuye.

⁴ Lewi bənsənna muxuna ndee yi keli, e te gbingbinna fari, Yosuwe nun Bani nun Kadamile nun Səbaniha nun Bunni nun Serebi nun Bani nun Kenani. Ne yi e xuini te Alatala ma, e Ala.

⁵ Lewi bənsənna muxune, Yosuwe nun Kadamile nun Bani nun Xasabaneya nun Serebi nun Hodiya nun Səbaniha nun Petaxi yi a fala, e naxa, “E keli, en Alatala, en ma Ala tantun habadan han habadan!”

E yi Ala maxandi, e naxa,
 “Nxu i xili binyen tantunma,
 tantunna naxan dangu binyen nun tantunna
 birin na!

⁶ I tan nan keden pe Alatala ra,
 i tan naxan ariyanna nun kore xənna nun sarene
 birin daxi,

i bəxə xənna nun a yi seene birin da,
 e nun baane nun e yi seene birin.

I yi niin bira niimaseene birin yi,
 malekane birin e xinbi sinma i tan nan bun.

⁷ I tan Marigina Alatala,

i tan nan Iburama sugandi,
i yi a ramini Yuru taani Babilɔn yamanani,
i yi a xili sa, Iburahima.

⁸ I yi a to a dɛnkɛɛyaxi i ma a bɔɲɛni,
i yi layirin xidi ɛ tagi
a i xa Kanan kaane nun Xitine nun Amorine
nun Perisine nun Yebusune
nun Girigasane yamanan so a bɔnsɔnna yii.
I dɛ xuiin nakamali nɛn bayo i tinxin.”

⁹ “I nxu benbane ɲaxankatan to nɛn Misiran yi,
i yi e gbelegbele xuiin mɛ Gbala Baan dɛ.

¹⁰ I yi taxamasenne nun kabanako feene yita Fira-
wona
nun a walikɛne nun a yamanan muxune birin na.
Amasɔtɔ i a kolon
e nxu benbane suxu kii naxan yi wasoni.
I yi xinla sɔtɔ naxan gbo han to.

¹¹ I yi baa igeni taxun e yɛɛ ra,
e yi baani gidi a yixaren na,
koni i tilin igen nadin nɛn
e sagatan muxune xun ma
alo gɛmɛna igen xɔnna ma.

¹² I yi kundaan ti e yɛɛ ra yanyin na,
i yi tɛ dɛgɛn ti e yɛɛ ra kɔɛɛn na
naxan yi kirani yalanma e yɛɛ ra.

¹³ I godo nɛn keli kore,
i falan ti e xa Sinayi geyaan fari.
I yi i gelene fala e xa naxanye tinxin,
e nun ɲɔndin sariyan nun tɔnne
nun yamarin naxanye fan.

¹⁴ Fata i ya walikɛɛn Musa ra,
i yi i ya Matabu Lɔxɔ sariɲanxin nun
i ya yamarine nun sariyane nun tɔnne yita e ra.

15 Kamɛn to e suxu,
i yi donseen nagodo e ma keli kore.
Min xɔnla to e suxu,
i yi igen namini fanyeni,
i yi a fala e xa a e xa so yamanani
i kɔlɔ naxan so fe ra e benbane yii.

16 Koni nxu benbane murute nɛn wasoni,
e mi i ya yamarine suxu.

17 E mi tin e suxe,
e jinan i ya kabanako feene xɔn
i naxanye liga e xa,
e yi e bɔjɛni xɔdɔxɔ e murutɛni,
e yi a nata
a e xa yɛɛrati gbɛtɛ sugandi,
e xɛtɛ e konyiyani Misiran yi.*
Koni i tan mi i mɛ e ra.
Ala nan i tan na
naxan muxune mafeluma e yulubine ra.

I dija, i kininkinin,
i mi xɔlɔn xulɛn,
i ya hinanna gbo.

18 E yi jinge di sawura wure daxin nafala e yetɛ xa,
e naxa, 'En ma Ala nan ito ra,
naxan en naminixi Misiran yi.'
E yi fala jaxine ti i ma.

19 Koni i ya kininkinin gbeeni,
i mi e rabɛjin tonbonni.
Kundaan lu nɛn e yɛɛ ra kiraan xɔn yanyin na,
tɛ dɛgɛn yi lu e yɛɛ ra kɔɛɛn na.

20 I yi i ya Nii fajin naso e yi
alogo a xa e xaran,

* 9:17: Yatɛne 14.4

i yi i ya Manna donseen† so e yii,
e nun igena,
min xɔnla to e suxu.

21 I yi i yengi dɔxɔ e xɔn ma
tonbonni ɲɛɛ tonge naanin,
sese mi dasa e ma,
e dugine mi kala,
e sanne mi kusin.

22 I yamanane nun siyane so nɛn e yii,
i yi e rabilinna yamanane birin sa e sagoni.
E yi Xɛsibɔn mangan Sixɔn ma yamanan tongo e
gbeen na,
e nun Ogo a yamanana, Basan mangana.

23 I yi e diine rawuya ayi
alo sarene kore xɔnna ma,
i yi e raso yamanani, i kɔlɔ
e benbane xa dɛnaxan ma fe yi.

24 E yixɛtɛne yi so mɛnni,
e dɔxɔ na yamanani,
i yi na yamanan muxune rayagi e yetagi,
Kanan kaane, i yi e sa e sagoni,
e mangane nun e yamanane muxune,
alogo e xa e raba e waxɔnna ra.

25 E yi taa makantanxine tongo
e nun bɔxɔ fajina,
e yi banxine tongo
naxanye yi rafexi se fajin sifan birin na,
e nun xɔɲinne nun manpa binle
nun oliwi binle nun wudi bogila wuyaxine,
e yi e don, e yi lugo, e yi gbo,
e yi lu hɛri gbeenii.”

† 9:20: **Manna donsena** a fe mato Xɔɔɔyaan 16.13-15 nun 16.31 kui.

26 “Koni, e keli nɛn
 e yi murute i xili ma.
 E yi e xun xanbi so i ya sariyane yi,
 e yi nabine faxa,
 naxanye yi e mabandunma i ma,
 e yi Ala rayelefu gbeene ti.

27 Nayi, i yi e sa e yaxune sagoni,
 ne yi e tɔrɔ.

Koni e ɲaxankatan waxatini,
 e xui ramini nɛn i ma,
 i yi e xuiin name kore xɔnna ma,
 i yi e yabi i ya kininkinin gbeeni,
 i yi e xunba muxune fi e ma,
 naxanye e ba e yaxune yii.

28 Koni, e xɔrɔyaan sɔtɔ nɛn tun,
 e mɔn yi fe ɲaxine liga fɔlɔ i yɛɛ ra.
 Nayi, i yi e rabeɲin e yaxune yii,
 e yi e nɔ.

Koni, e mɔn yi e xui ramini i ma,
 i yi e xuiin name kore xɔnna ma
 i ya kininkinin gbeeni,
 i mɔn yi e rakisi sanɲa ma wuyaxi.

29 I yi e mabandun i ya sariyan ma,
 koni e yi findi wasodene ra,
 e mi e tuli mati i ya yamarine ra.

E yi yulubin liga
 e i ya kiti saxine kala,
 anu naxan na e suxu,
 na kanna nii rakisin sɔtɔma nɛn e xɔn.
 E yi murute,
 e tondi e tuli matiyɛ i tan na.

30 I ti nɛn e bun ma ɲɛɛ wuyaxi,
 i yi e rakolon i ya Nii Sariɲanxin na nabine xɔn,

koni e mi e tuli mati.
Nayi, i yi e sa e yamana gbεεye sagoni.

³¹ I ya kininkinin gbeeni,
i mi e raxɔri, i mi e rabejin,
bayo Ala dijaxi kininkininxin nan i tan na.”

³² “Iki, nɔ Ala, Ala gbeena,
ɛnbɛmana, i tan naxan magaxu,
i tan naxan i ya layirin nakamalima
i ya hinanni,
fe xɔlɛn naxanye nxu sɔtɔxi,
e nun nɔ mangane nun nɔ nabine
nun nɔ saraxaraline nun nxu benbane nun ya-
maan birin,
i nama ne yatɛ fe fuune ra,
sa fɔlɔ Asiriya mangane waxatin ma han to.

³³ Feen naxanye birin nxu sɔtɔxi,
i tan tinxin ne birin yi,
bayo i ya lannayaan yita nɛn,
koni nxu tan fe jaxin nan liga.

³⁴ Nɔ mangane nun nɔ kuntigine
nun nɔ saraxaraline
nun nxu benbane mi i ya sariyane suxu,
e mi i ya yamarine suxu,
e nun i ya maxadi xuine,
i yi naxanye falama e xa.

³⁵ E yi e yamanani
waxatin naxan yi hɛri gbeeni
i naxan so e yii,
yamana sabatixi gbeeni
i naxan sa e sagoni,
e mi i batu,
e mi xɛtɛ e kɛwali jaxine fɔxɔ ra.

³⁶ To, nxu bata findi konyine ra yamanani
i naxan so nxu benbane yii
alogo e xa balo na bogiseene nun a se fajine ra.

³⁷ A seene bata findi mangane gbeene ra
i nxu saxi naxanye sagoni
masotɔ nxu yulubine xɔn.
Nxu nun nxɔ xuruseene bata lu e sagoni,
nxu lu jaxankata gbeeni.”

10

Sariyan suxu fena yamaan xɔn

¹ “Amasotɔ na feene birin xɔn, nxu tan Isirayila
kaane bata lan feni ito ma, nxu yi a seβε, nxɔ
kuntigine nun Lewi bɔnsɔnna muxun naxanye
nxu ye, e nun nxɔ saraxaraline yi e yii fɔxɔn sa a
ma.”

² Muxun naxanye e yii fɔxɔn sa a ma, ne xinle ni
itoe ra: Yamana kanna Neyemi, Xakaliyaa diina e
nun Sedeki nun

³ Seraya nun Asari nun Yeremi nun

⁴ Pasaxuri nun Amari nun Malakiya nun

⁵ Xatusi nun Sebaniha nun Maluku nun

⁶ Xarimi nun Meremoti nun Abadi nun

⁷ Daniyeli nun Gineton nun Baruku nun

⁸ Mesulan nun Abiya nun Miyamin nun

⁹ Maasiya nun Biligayi nun Semaya. Saraxara-
line nan yi ne ra.

¹⁰ Lewine ye:

Asani a dii xεμεν Yosuwe nun Xenadadaa diine
Binuwi nun Kadamile

¹¹ e nun e ngaxakedenne: Sebaniha nun Hodiya
nun Kelita nun Pelaya nun Xanan

¹² nun Mika nun Rexobo nun Hasabi

13 nun Sakuru nun Serebi nun Sɛbaniha

14 nun Hodiya nun Bani nun Beninu.

15 Yamaan kuntigine yɛ: Parosi nun Paxata-Moyaba nun Elan nun Satu nun Bani nun

16 Bunni nun Asagada nun Bebayi nun

17 Adoniya nun Bigiwayi nun Adin nun

18 Ateri nun Xesekiya nun Asuru nun

19 Hodiya nun Xasun nun Besayi nun

20 Xarifi nun Anatoti nun Nebayi nun

21 Magapiyasi nun Mesulan nun Xesiri nun

22 Mesesabele nun Sadaki nun Yaduwa nun

23 Pɛlati nun Xanan nun Anaya nun

24 Hoseya nun Xananiya nun Xasubu nun

25 Haloxesi nun Pilixa nun Sobeki nun

26 Rexun nun Xasabana nun Maaseya nun

27 Axiya nun Xanan nun Anan nun

28 Maluku nun Xarimi nun Banaha.

29 Yamaan dɔnxɛn birin yi sa e fari, saraxaraline nun Lewine nun taan dɛ kantanne nun bɛti baane nun Ala Batu Banxin walikɛne nun muxun naxanye birin xɛtɛ nxu rabilinna siyane fɔxɔ ra, e bira Alaa sariyan fɔxɔ ra, e yi e mali, e ɲaxanle nun e dii xɛmɛne nun e dii tɛmɛn naxanye birin yi nɔɛ feen famunɲɛ.

30 E birin yi sa e ngaxakedenne fari, e kuntigine. E yi e kɔlɔ a e xa Alaa sariyan suxu, a walikɛɛn Musa naxan nalixi nxu ma, nxu yi nxu Marigina Alatalaa sariyane nun yamarine birin suxu.

31 Nxu bata yi dɛ xuiin tongo a nxu nama nxɔ dii tɛmɛne fi siya gbɛtɛne ma naxanye dɔxi nxɔ yamanani, nxu mɔn mi e dii tɛmɛne tongoma ɲaxanle ra nxɔ dii xɛmɛne xa.

³² Na muxune yulane na fa Matabu Ləxəni hanma ləxə sarijanxine yi, nxu nama yulaya se yo sara ne ma hanma donseene. Nxu yi bəxən fan lu a yi a matabu jεε soloferedeni, nxu mi xεen bima na jεen na, nxu donle fan nakala ayi.

³³ Nxu bata sariyan sa fa fala nxu xa gbeti fixen garamu naanin fi jεε yo jεε, a findi nxə Ala Batu Banxin nawali seen na.

³⁴ A xa findi buru rasarijanxin saren na, e nun bogise saraxane nun saraxa gan daxine nun saraxan naxanye bama Matabu Ləxəne ma e nun kike nənən sanle hanma sali ləxə gbətəye ma. A tan nan mən findima saraxa gbətəye saren na saraxa sarijanxine nun yulubi xafari saraxane ra Isirayila xa, e nun wanle birin en ma Ala Batu Banxini.

³⁵ Nxu tan saraxaraline nun Lewine nun yamaan bata masensenna ti alogo a xa kolon muxune lanma e xa fa yegen na waxatin naxan yi Ala Batu Banxini denbaya yεen ma jεε yo jεε alogo a xa gan Alatalaa saraxa gandeni, en ma Ala, alo a seβexi kii naxan yi sariyani.

³⁶ Nxu bata de xuiin tongo a nxu xa fa nxə bəxən bogise singene nun wudi bogi singene ra Alatala Batu Banxini,

³⁷ nxu yi fa nxə dii singene nun nxə xuruseene dii singene ra Ala yetagi, alo sariyana a falaxi kii naxan yi. Nxu fa nxə jingene dii singene nun yεxene nun siine dii singene ra Ala Batu Banxini. Nxu yi e so saraxaraline yii naxanye walima Ala Batu Banxini.

³⁸ Nxu mən yi siga nxə sansi singene ra saraxaraline xən Ala Batu Banxin se ramaradeni, e nun

bogise saraxane nun wudi bogine nun manpa nɛnɛn nun turena. Bɔxɔn bogiseene yaganna yi findi Lewine gbeen na. E tan nan yati e rasuxuma taane birin yi nxu dɛnaxanye bima.

³⁹ Harunaa yixɛtɛna nde luma nɛn Lewine fɔxɔ ra e nɛma sigɛ yaganne tongodeni waxatin naxan yi. Lewine yi na yaganna dɔxɔde fuden xali Ala Batu Banxin gbeti ramaradeni.

⁴⁰ Isirayila kaane nun Lewine sigama nɛn e murutune nun manpa nɛnɛne nun turen yaganne ra Ala Batu Banxin se ramaradeni, yire sarijanxin goronne dɛnaxan yi, Ala Batu Banxin saraxaraline nun dɛ kantanne nun beti baane fan luma mɛnna nin.

Na kiini, en mi en ma Ala Batu Banxin nabɛjinma.

11

Yuda kaan naxanye fa dɔxɔ Yerusalen yi

¹ Yamana kanne yi fa dɔxɔ Yerusalen yi. Yamaan dɔnxɛn yi masɛnsɛnna ti alogo muxu fu yɛ, muxu keden xa fa dɔxɔ Yerusalen yi, taa rasarijanxina. Muxu fu yɛ, muxu solomanaanin nɔɛ luyɛ nɛn e kon taane yi.

² Yamaan yi barika bira na muxune xa naxanye birin tin e xa fa dɔxɔ Yerusalen yi.

³ Yamana kanni itoe nan fa dɔxɔ Yerusalen yi, koni Isirayila kaana ndee nun saraxaraline nun Lewine nun Ala Batu Banxin walikɛne nun Sulemani a banxin walikɛne denbayane, ne yi lu e taani Yuda yi, birin yi lu a kon yi.

Taruxune Singen 9.3-17

⁴ Yuda kaana ndee nun Bunyamin kaana ndee fa dɔxɔ nɛn Yerusalɛn yi.

Yuda bɔnsɔnna muxune yɛ: Ataya. Yusiya nan Ataya sɔtɔ. Sakari nan Yusiya sɔtɔ. Amari nan Sakari sɔtɔ. Sɛfati nan Amari sɔtɔ. Mahalaleli nan Sɛfati sɔtɔ Peresi xabilani.

⁵ Maaseya fan fata Yuda bɔnsɔnna nan na. Baruku nan Maaseya sɔtɔ. Kola-Xose nan Baruku sɔtɔ. Xasaya nan Kola-Xose sɔtɔ. Adaya nan Xasaya sɔtɔ. Yoyaribi nan Adaya sɔtɔ. Sakari nan Yoyaribi sɔtɔ Silo xabilani.

⁶ Peresi yixɛtɛn naxanye yi dɔxi Yerusalɛn yi, sofa kɛndɛne: muxu kɛmɛ naanin muxu tonge sennin e nun solomasɛxɛ.

⁷ Bunyamin bɔnsɔnna muxune yɛ: Salu. Mesulan nan Salu sɔtɔ. Yowedi nan Mesulan sɔtɔ. Pɛdaya nan Yowedi sɔtɔ. Kolaya nan Pɛdaya sɔtɔ. Maaseya nan Kolaya sɔtɔ. Itiyeli nan Maaseya sɔtɔ. Yɛsaya nan Itiyeli sɔtɔ.

⁸ Salu nun a fɔxɔrabirane nan yi a ra, Gabayi nun Salayi. Xɛmɛne gbansanna, muxu kɛmɛ solomanaanin muxu mɔxɔɲɛn nun solomasɛxɛ nan yi Yerusalɛn yi Bunyamin bɔnsɔnna muxune ra.

⁹ Sikiri a diin Yoweli nan yi e sofa kuntigin na, Hasɛnuwaa dii xɛmɛn Yuda nan yi taan kuntigi firinden na.

¹⁰ Saraxaraline yɛ: Yoyaribi a dii xɛmɛn Yɛdaya nun Yakin nun

¹¹ Xiliki a diin Seraya. Mesulan nan Xiliki sɔtɔ. Sadɔki nan Mesulan sɔtɔ. Merayoti nan Sadɔki sɔtɔ. Axituba nan Merayoti sɔtɔ. Axituba yi findixi Ala Batu Banxin kuntigin nan na.

¹² Ne nun e walikɛne yi muxu kɛmɛ solomasɛxɛ muxu mɔxɔɲɛn nun firin nan xun na naxanye

yi walima Ala Batu Banxini. Yeroxamaa diina Adaya yi findixi denbaya xunna nan na. Pelaliya nan Yeroxama sɔɔ. Amasi nan Pelaliya sɔɔ. Sakari nan Amasi sɔɔ. Pasaxuri nan Sakari sɔɔ. Malakiya nan Pasaxuri sɔɔ.

¹³ Adaya nun a ngaxakedenne, muxu keme firin muxu tonge naanin e nun firinna findi denbaya xunne nan na. Asareli a diina Amasasayi fan findi kuntigin nan na. Axasayi nan Asareli sɔɔ. Mesilimoti nan Axasayi sɔɔ. Imeri nan Mesilemoti sɔɔ.

¹⁴ Sofa kenden muxu keme muxu mɔxɔɲen nun solomasexe nan yi Amasasayi nun a ngaxakedenne ye. Hagedolimi a diin Sabadiyeli nan yi e yamaan xunna ra.

¹⁵ Lewi bɔnsɔnna muxune ye: Xasubu a diin Semaya. Asirikami nan Xasubu sɔɔ. Hasabi nan Asirikami sɔɔ. Bunni nan Hasabi sɔɔ.

¹⁶ Sabetayi nun Yosabadi Lewi kuntigine ye, ne nan yi wanle kema naxanye yi Ala Batu Banxin fari ma.

¹⁷ Mikaa diin Matani fan yi na. Sabidi nan Mika sɔɔ. Asafi nan Sabidi sɔɔ. Asafi nan yi barika bira betin bama sali waxatini. Bakabukiya fan yi na naxan yi findixi kuntigi firinden na a ngaxakedenne ye, e nun Samuwaa diina Abada, Galali mamandenna, Yedutun tolobitana.

¹⁸ E birin malanxina, Lewi bɔnsɔnna muxune, muxu keme firin muxu tonge solomasexe e nun naanin nan yi taa sariɲanxini.

¹⁹ De kantanne ye: Akubu nun Talamɔn nun e ngaxakedenna naxanye yi deene kantanma, muxu keme muxu tonge solofere e nun firin.

²⁰ Isirayila kaa dɔnxɛne, saraxaraline nun Lewi bɔnsɔnna muxune, ne yi dɔxi Yuda taane nin e benbane bɔxɔne yi.

²¹ Ala Batu Banxin walikɛne yi dɔxi Ofɛli geyaan nan fari. Sixa nun Gisipa nan yi e kuntigine ra.

²² Bani a diin Yusi nan yi Lewine xun na Yerusalɛn yi. Hasabi nan Bani sɔtɔ. Matani nan Hasabi sɔtɔ. Mika nan Matani sɔtɔ Asafi bɔnsɔnni. Asafi yixɛtɛne yi findixi Ala Batu Banxin bɛti baane nan na.

²³ Bɛti baane yi mangana yamarin nan bun e nun sariyana lan lɔxɔ yo lɔxɔ bɛtin ma.

²⁴ Mesesabele a diin Petaxi, Yudaa diin Sera yixɛtɛne yɛ, na nan yi Isirayila yamaan xunna ra Perise mangan dɛxɔn.

Yahudiyane Yerusalɛn fari ma

²⁵ Yuda bɔnsɔnna muxuna ndee yi sa dɔxɔ banxidɛne nun taadine yi: Kiriyati-Aruba nun Dibon nun Yekabaseli nun e rabilinne taane yi,

²⁶ e nun Yosuwe nun Molada nun Bɛti-Pɛlɛti taane nun

²⁷ Xasari-Suwali nun Bɛriseba nun e rabilinne taane,

²⁸ e nun Sikilaga nun Mekona nun a rabilinna taane yi,

²⁹ e nun En-Rimɔn nun Sora nun Yaramuti taane nun

³⁰ Sanowa nun Adulan nun e rabilinne taane nun Lakisi nun a xɛne nun Aseka taan nun a banxidɛne. Nanara, e yi dɔxi Bɛriseba yi siga han Hinɔn lanbanna.

³¹ Bunyamin bɔnsɔnna muxun naxanye sa keli Geba yi, ne yi dɔxi Mikimasi nun Aya nun Bɛtɛli taane nun e rabilinne nun

- ³² Anatəti nun Nobi nun Ananiya nun
³³ Xasori nun Rama nun Gitayin nun
³⁴ Xadidi nun Seboyin nun Nebalati nun
³⁵ Lodi nun Ono taane nun Yiirawanle Lan-
 banna nin.
³⁶ Yuda yamanan Lewi bənsənnə muxuna ndee
 yi dəxi Bunyamin yamanan nin.

12

Saraxaraline nun Lewi bənsənnə

¹ Saraxaralini itoe nun Lewi bənsənnə muxuni itoe nun Selatili a diin Sorobabeli nun Yosuwe nan xεtε sa keli konyiyani yamana gbεtε yi: Seraya nun Yeremi nun Esirasi nun

² Amari nun Maluku nun Xatusi

³ nun Sεkani nun Rexun nun Meremoti

⁴ nun Yido nun Gineton nun Abiya

⁵ nun Miyamin nun Maadiya nun Biliga

⁶ nun Semaya nun Yoyaribi nun Yεdaya

⁷ nun Salu nun Amoki nun Xiliki nun Yεdaya. Xεmēni itoe nun e ngaxakedenne nan findi saraxarali kuntigine ra Yosuwe waxatini.

⁸ Lewi bənsənnə muxune nan yi itoe ra: Yosuwe nun Binuwi nun Kadamile nun Serebi nun Yuda nun Matani. Matani nun a muxune nan yi barika bira βetine bama.

⁹ E ngaxakedenne Bakabukiya nun Yunni yi tixi e yεtagi Ala batu waxatini.

Saraxarali kuntigine yixεtene

¹⁰ Yosuwe yi Yoyakin sətə, Yoyakin yi Eliyasibi sətə, Eliyasibi yi Yoyada sətə.

¹¹ Yoyada yi Yonatan sətə, Yonatan yi Yaduwa sətə.

¹² Yoyakin yi saraxarali kuntigiyani waxatin naxan yi, muxuni itoe nan yi saraxaraline denbayane xunne ra:

Meraya, Serayaa denbaya xunna

e nun Xananiya, Yeremi a denbaya xunna

¹³ Esirasi, Mesulan ma denbaya xunna

e nun Yehoxanan, Amari a denbaya xunna

¹⁴ e nun Yonatan, Maluku a denbaya xunna

e nun Yusufu, Sebanihaa denbaya xunna

¹⁵ e nun Xarimi, Adanaa denbaya xunna

e nun Xelekayi, Merayoti a denbaya xunna

¹⁶ e nun Sakari, Yido a denbaya xunna

e nun Mesulan, Gineton ma denbaya xunna

¹⁷ e nun Sikiri, Abiyaa denbaya xunna

e nun Mowadi, Miniyamin ma denbaya xunna

¹⁸ e nun Samuwa, Biligaa denbaya xunna

e nun Yehonatan, Semayaa denbaya xunna

¹⁹ e nun Matenayi, Yoyaribi a denbaya xunna

e nun Yusi, Yedayaa denbaya xunna

²⁰ e nun Kalayi, Salayi a denbaya xunna

e nun Eberi, Amoki a denbaya xunna

²¹ e nun Hasabi, Xiliki a denbaya xunna

e nun Nataneli, Yedayaa denbaya xunna.

²² Eliyasibi nun Yoyada nun Yoxanan nun Yaduwa waxatini, Lewi bənsənna muxune denbaya xunne nun saraxaraline xinle səbε nən Perise kaan Dariyusi a mangayaan waxatini.

²³ Lewi bənsənna muxune denbaya xunne fan xinle səbε nən taruxu kədine kui han Eliyasibi a diin Yoxanan waxatina.

²⁴ Hasabi nun Serebi nun Kadamile a diin Yosuwe nan yi Lewi bənsən xunne ra. Ala batu waxatini, e yi tima nən e ngaxakedenne yetagi, e

Ala tantunma, e barikan bira Ala xa e ti yεεn ma alo Dawuda, Alaa muxuna a yamarixi kii naxan yi.

²⁵ Matani nun Bakabukiya nun Abadi nun Mesulan nun Talamɔn nun Akubu nan yi Ala Batu Banxin se ramaraden dε kantanne ra.

²⁶ E yi walima Yosuwe a dii xεmεn Yoyakin waxatin nin, Yosadaki mamandenna, e nun yamana kanna Neyemi waxatin nun saraxaraliin nun sεbɛli tiina Esirasi waxatini.

Sεwana Yerusalɛn yinna fe yi

²⁷ Yerusalɛn yinna to yelin nafalε, e yi sa Lewine tongo alogo e mɔn xa fa dɔxɔ Yerusalɛn yi e lan naxanaxani bayo Yerusalɛn yinna bata yelin tiyε, e yi Ala tantun bɛti ba kariɲanne nun kondenne nun bɔlɔnne ra.

²⁸ Bɛti baane yi e malan keli Netofa banxidεne ra Yerusalɛn rabilinna nun

²⁹ Bɛti-Giligali taan nun Geba nun Asamawɛti yamanane yi. Bɛti baane bata yi taane ti Yerusalɛn rabilinni.

³⁰ Saraxaraline nun Lewine yi e yεtε rasariɲan, e yamaan fan nasariɲan, e nun taan dεene nun a yinna.

³¹ N yi yamarin fi a Yuda kuntigine xa te yinna xuntagi. N yi bɛti baane yitaxun firinna ra. A singen yi siga yiifanna ma yinna xuntagi Xuruse Nεɲε Dεɛn binni.

³² Hosaya nun Yuda kuntigine fɔxɔ kedenna biraxi e fɔxɔ ra,

³³ e nun Asari nun Esirasi nun Mesulan nun

³⁴ Yuda nun Bunyamin nun Semaya nun Yereimi

³⁵ e nun saraxaraline diine, xɔtaan yi naxanye yii e nun Yonatan ma diin Sakari. Semaya nan Yonatan sɔɔ. Matani nan Semaya sɔɔ. Mikahu nan Matani sɔɔ. Sakuru nan Mikahu sɔɔ. Asafi nan Sakuru sɔɔ.

³⁶ A ngaxakedenne fan yi a fɔxɔ ra: Semaya nun Asareli nun Milalayi nun Gilalayi nun Maayi nun Nataneli nun Yuda nun Xanani. Dawuda, Alaa muxuna beti ba seene yi e yii. Sebɛli tiina Esirasi nan yi tixi e yɛɛ ra.

³⁷ E to Tigi Dɛɛn li, e yi te Dawudaa Taan kiraan xɔn, te yinna xuntagi, Dawudaa banxin xun ma, siga han Ige Dɛna sogeteden binni.

³⁸ Bɛti baane dɔxɔden firinden yi siga kɔmɛna ma. Nxu nun yama dɔnxɛn yi bira e fɔxɔ ra yinna xuntagi. Nxu yi dangu Buru Ganden Sangansoon na siga han yinna yigbo yirena,

³⁹ han Eframi Dɛɛn xanbi ra, siga han Dɛ Fonna, dangu Yɛxɛ Dɛɛn na, han Xananeli Sangansona e nun sangansoon naxan xili Kɛmɛ han Yɛxɛɛne So Dena. E yi ti Kantan Ti Dɛɛn na.

⁴⁰ Na xanbi ra, beti ba dɔxɔ firinne yi ti Ala Batu Banxini. Nxu nun kuntigine yi ti naxanye yi n fɔxɔ ra, e nun

⁴¹ saraxaraline: Eliyakimi nun Maaseya nun Miniyamin nun Mikahu nun Eliyowenayi nun Sakari nun Xananiya. E xɔtane suxi e yii.

⁴² Maaseya nun Semaya nun Eleyasari nun Yusi nun Yehoxanan nun Malakiya nun Elan nun Eseri fan yi na. Yesiraxiya nan yi beti baane yɛɛratiin na.

⁴³ Muxune yi saraxa wuyaxi ba na lɔxɔni, e sɛwa, bayo Ala bata yi sɛwa fe gbeen nagidi e ma.

Naxanle nun diidine fan yi sɛwa, Yerusalɛn sɛwa xuiin yi mɛma yire makuyeni.

⁴⁴ Na lɔxɔni, e yi muxune dɔxɔ se ramaradene xunna bogise singene nun yaganne yi ramarama dɛnaxanye yi. E yi e ti ne malanna ra, yamanan taane birin yi, naxan lanma a so saraxaraline nun Lewine yii Ala kiseen na. Yuda kaane yi sɛwaxi bayo saraxaraline nun Lewine birin yi e wanla ra.

⁴⁵ E lu Alaa wanla kɛ, e nun marasarijan wanla, e nun bɛti baane nun kantan tiine alo Dawuda nun a dii xɛmɛn Sulemani a yamari kii naxan yi.

⁴⁶ Bayo waxati danguxini, Dawuda nun Asafi waxatini, bɛti ba kuntigine yi na e nun bɛtine Ala tantun xinla ma.

⁴⁷ Sorobabeli nun Neyemi waxatini, Isirayila kaane birin yi seene soma nɛn bɛti baane nun kantan tiine yii alo a yi lan kii naxan yi lɔxɔ yo lɔxɔ. E yi e yagan sarijanxine soma nɛn Lewine yii, Lewine fan yi nde so Haruna yixɛtɛne yii.

13

Neyemi kɛwali dɔnxɛne

¹ Na waxatini, e yi Musaa sariya kɛdin xaran yamaan xa, e yi a to sɛbɛxi fa fala, Amonine nun Moyaba kaane mi lan e so Alaa yamani mumɛ,*

² amasɔɔ waxati danguxini, e mi Isirayila kaane yisuxu, e mi donseen nun igen so e yii, e yɛtɛn yi Balami saren fi alogo a xa e danga. Koni, en ma Ala yi dangan maxɛtɛ duban na.†

³ Yamaan to sariya kɛdin xaran xuiin namɛ, e yi xɔɲɛne birin kedi Isirayila kaane yɛ.

* **13:1:** Na feen sɛbɛxi Sariyane 23.4-6 kui. † **13:2:** Na feen sɛbɛxi Yatɛne 22.1-6 kui.

⁴ Benun na xa liga, saraxaralina Eliyasibi naxan yi walima en ma Ala Batu Banxin se ramaradene yi, naxan mən yi findixi Tobiya ngaxakedenna ra,

⁵ na bata yi banxin kuiin yire belebelena nde yitən Tobiya xa, bogise saraxane nun wusulanna nun goronne yi ramaraxi dənaxan yi nun, e nun murutun yaganna nun manpaan nun turena, naxan yi findixi Lewi bənsənna muxune gbeen na, e nun bəti baane nun kantani tiine nun saraxaraline.

⁶ N mi yi Yerusaleŋ yi na waxatini na feene ligε, amasətə n bata yi xεtε Babilən mangana Aratasεrəkεsi fεma, a mangayaan ɲεε tonge saxan e nun firinden ma. Na xanbi ra, n yi mangan maxədin, a yi tin n xa siga,

⁷ n yi xεtε Yerusaleŋ yi. N yi fe ɲaxin to Eliyasibi naxan naba, a to palana nde so Tobiya yii Alaa banxin yinna kui.

⁸ Na yi n xələ ki faɲi. N yi Tobiya yiiseene birin namini palaan fari ma.

⁹ N yi yamarin fi a e xa palane rasariɲan, n mən yi Ala Batu Banxin seene dəxə e funfune yi, e nun bogise saraxane nun wusulanne.

¹⁰ N mən yi a mε a Lewine mi e gbee saraxane sətəxi, n mən yi a mε fa fala Lewine nun bəti baan naxanye yi walima Ala Batu Banxini, ne bata xεtε e xεne ma.

¹¹ N yi kuntigine maxadi, n naxa, “Nanfera Ala Batu Banxin bata rabɛɲin?” N yi Lewine nun bəti baane malan, n yi birin ti a funfuni.

¹² Nayi, Yuda kaane birin yi fa yaganna nun murutun nun turen na se ramaradeni.

¹³ N yi se ramaradeni taxu saraxaraliin Selemiya

nun sɛbɛli tiin Sadɔki nun Lewina nde ra naxan xili Pɛdaya. N yi Sakuru a diin Xanan findi e mali muxun na, Matani mamandenna, bayo birin yi laxi e ra. E tan nan yi sɔlɔnni taxunma e ngaxake-denne ma.

¹⁴ N ma Ala, n ma fe xa rabira i ma, na ma, n naxan nabaxi lannayani n ma Alaa banxin xa alogo i xa batu. I nama i mɛ n na.

¹⁵ N muxune to na waxatin nin sali lɔxɔni Yuda yamanani, e manpa bogine yibutuxunma. Nde yi bogise xidine rasoma, e xidixi sofanle fari, e nun wudi bogi igen nun manpa bogine nun xɔdɛne nun goronna sifan birin, siga Yerusalɛn yi Matabu Lɔxɔni. N yi a fala e xa a e nama fa donseene mati na lɔxɔni.

¹⁶ Tire kaane fan yi dɔxi mɛnni, naxanye fan yi fama yɛxɛn nun sare seen sifan birin na, e yi e mati Yuda kaane ma Yerusalɛn yi sali lɔxɔni.

¹⁷ N mɔn yi Yuda fonne maxadi, n naxa, “Fe naxini ito bunna nanse ra, ɛ yi Matabu Lɔxɔn naxɔsi?”

¹⁸ Ɛ benbane fan mi ito xan liga ba? Ala bata fe naxini itoe birin nafa en nun taani ito ma. Ɛ tan mɔn a xɔlɔn fari sama Isirayila xili ma, ɛ yi Matabu Lɔxɔn sariɲanna kala.”

¹⁹ Na xanbi ra, benun Matabu Lɔxɔn xa a li, dimin nɛma Yerusalɛn dɛɛne li tun, n yi yamarin fi, a dɛɛne xa ragali, e nama fa rabi fɔ Matabu Lɔxɔn na dangu. N yi n ma walikɛna ndee dɔxɔ dɛɛne ra, alogo muxune nama so goronne ra Matabu Lɔxɔni.

²⁰ Na ma, sare matine nun sare soone yi kɔɛɛn nadangu Yerusalɛn fari ma sanɲa ma keden hanma sanɲa ma firin.

21 N yi e rakolon, n naxa, “Nanfera ε kαεεn nadanguma yinna fari ma? Xa ε mαn a liga, n na ε suxuma nεn.” Xabu na lαxαni, e mi fa fa Matabu Lαxαni sαnαn.

22 N mαn yi yamarin fi Lewine ma a e xa e rasariɲan, e fa dεεne kantan alogo e xa Matabu Lαxαn findi lαxα sariɲanxin na.

Na feen ma, n ma fe xa rabira i ma, n ma Ala, i yi n kantan i ya hinan gbeeni.

23 Na waxatini, Yuda kaana ndee bata yi ɲaxanle dαxα naxanye yi kelixi Asadodi nun Amoni nun Moyaba siyane ye.

24 E diine fαxα kedenna yi Asadodi xuiin falama ba xui gbεtεye ra, koni e mi yi nαε Heburu xuiin falε.

25 N yi e maxadi, n yi e danga, n yi ndee bαnbα, n yi e xunsexeεne matala, n yi e rakαb Ala yi, n naxa, “E nama ε dii tεmεne so siya gbεtεne yii e ɲaxanle ra, ε nama siya gbεtεne dii tεmεne tongo ε nun ε dii xe mεne xa.

26 Isirayila mangan Sulemani mi yulubin liga na kiin xan yi ba? A ɲαxαn manga mi yi na siyane ye, a yi rafan a Ala ma. Ala bata yi a findi mangan na Isirayila birin xun na. Koni hali na, siya gbεtεne ɲaxanle a ti nεn yulubin ma.

27 Nxu fa a mε iki fa fala a ε fe ɲaxi sifani ito ligama, fe ɲaxi gbeena en ma Ala ra, ε yi siya gbεtε ɲaxanle dαxα.”

28 Yehoyadaa dii xe mεna nde, saraxarali kuntigina Eliyasibi mamandenna yi findixi Horoni kaan Sanbalata bitanna nan na. N yi a kedi n ye tagi.

29 E fe xa rabira i ma, n ma Ala, bayo e bata

saraxarali wanla sariɣanna kala, e nun saraxaraline nun Lewine layirina.

³⁰ N na e birin nasariɣan neɛn xɔɣene seene birin ma, n mɔn yi saraxaraline nun Lewine ti e wanle ra.

³¹ N mɔn na liga neɛn saraxa yegene ra waxati saxini, e nun bogise singene.

N ma Ala, n ma fe xa rabira i ma, i fan n na.

Kisin Kiraan Kitabuna

**The Holy Bible in the Yalunka language of Guinea.
La Sainte Bible en langue Yalunka avec le titre: «Kisin
Kiraan Kitabuna» Publié par Traducteurs Pionniers
de la Bible en collaboration avec la mission MCA à la
Préfecture de Faranah, République de Guinée 2012
Copyright du text: © 2012—Traducteurs Pionniers de
la Bible. Cette création est mise à disposition selon le
Contrat Paternité-Pas d'Utilisation Commerciale-Pas
de Modification 3.0 Unported disponible en ligne
<http://creativecommons.org/licenses/by-nc-nd/3.0/> ou
par courrier postal à Creative Commons, 171 Second
Street, Suite 300, San Francisco, California 94105, USA.**
copyright © 2012 Pioneer Bible Translators

Language: Yalunka

Translation by: Pioneer Bible Translators

..

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 18 Apr 2025 from source files dated 29 Jan 2022

47153269-13a8-5fdd-8537-530b29da9f78